

四庫全書

子部

欽定四庫全書

冊府元龜卷七百三十六 宋 王欽若等 撰

陪臣部

智謀

傳云智者利人又云咨難曰謀蓋智以興利謀以紓難者古之道也春秋之世下逮戰國諸侯競取其霸大夫各圖其功故有處重臣之列負先見之明考幾微極思慮畫經久之畧獻康濟之謀詭辭以濟禍亂重幣以誤

仇敵或兵車之既會金鼓之既陳辨盟載之義決勝負之策飾之以文辭潤之以禮樂足以警服諸夏光啓邦家若其合從連衡構怨速禍專任喉舌遐棄二刑者蓋不足稱焉

管子名夷吾字敬仲齊大夫也桓公問於管仲曰楚者山東之強國也其人民習戰鬪之道舉兵伐之恐力不能過兵弊於楚功不成於周為之奈何管子對曰即以戰鬪之道與之矣曰何謂也管子對曰公貴買其鹿桓

公即為百里之域使人之楚買生鹿楚生鹿當一而
八萬管子即令桓公與民通輕重藏穀什之六令左司
馬伯公將白徒而鑄錢於莊山令中大夫王邑載錢二
千萬求生鹿於楚楚王告其相曰彼金錢人之所重也
國之所以存明主之所以賞有功禽獸者羣害也明主
之所棄逐也今齊以重寶貴買吾羣害則是楚之福也
天且以齊私楚也子告吾民急求生鹿以盡齊之寶楚
民即釋其耕農而田鹿管仲告楚之賈人曰子為我致

生鹿二十賜子金百斤什至而金千斤也則是楚不賦
於民而財用足也楚之男子居外女子居塗隰朋殺民
藏粟伍倍楚以生鹿藏錢伍倍管子曰楚可下矣公曰
奈何管子對曰楚錢伍倍其君且自得而修穀錢伍倍
是楚強也桓公諾因令人閉關不與楚通使楚王果自
得而修穀穀不可三月而得也楚糴四百齊因令人載
粟處芊之南楚人降齊者十分之四三年而楚服桓公
又曰寡人欲西朝天子而賀獻不足為此有數乎管子

對曰請以令城陰里使其牆三重而門九襲因使玉人
刻石而為璧尺者萬泉八寸者八千七寸者七千珪中
四千瑗中五百璧之數已具管子西見天子曰敝邑之
君欲率諸侯而朝先王之廟觀於周室請以令使天下
諸侯朝先王之廟觀於周室者不得不以彤弓石璧不
以彤弓石璧者不得入朝天子許之曰諾號令於天下
諸侯載黃金珠玉五穀文采布帛輸齊以收石璧流而
之天下天下財物流而之齊故國八歲而無藉陰里之謀也

桓公入曰寡人多務令衡籍吾國之富商蓄賈稱貸家以利吾貧萌農夫不失其本事反此有道乎管子對曰惟反之以號令為可耳桓公曰行事奈何管子對曰請使賓胥無馳而南隰朋馳而北寧戚馳而東鮑叔馳而西四子之行定夷吾請號令謂四子曰子能為我君視四方稱貸之間其受息之氓幾何千家以報吾鮑叔馳而西反報曰西方之氓者帶濟負河沮澤之萌也漁獵取薪蒸而為食其稱貸之家多者千鍾少者六七百鍾

其出之鍾也一鍾其受息之萌九百餘家賓胥無馳而
南反報曰南方之萌者山居谷處升降之萌也上斷輪
軸下采杼栗田獵而為食其稱貸之家多者千萬少者
六七百萬其出之中伯伍也其受息之萌八百餘家寧
咸馳而東反報曰東方之萌帶山負海若處上斷福漁
獵之萌也治葛縷而為食其稱貸之家丁惠高國多者
五千鍾少者三千鍾其出之中鍾五金也其受息之萌
八九百家隰朋馳而北反報曰北方之萌者衍處負海

煮沛為鹽梁濟取漁之萌也薪食其稱貸之家多者千萬少者六七百萬其出之中伯二十也受息之萌九百餘家凡稱貸之家出泉三千萬出粟三數千萬鍾受子息民三萬家四子已報管子曰不棄我君之有萌中國而五君之正也然欲國之無貧兵之無弱安可得哉桓公曰為此有道乎管子曰惟反之以號令為可耳諸以令賀獻者皆以鎸枝蘭皷則必坐長什倍其本矣君之棧臺之職以坐長什倍請以令召稱貸之家君因酌

之酒太宰行觴桓公舉衣而問曰寡人多務令衡藉吾國聞子之假貸吾貧萌使有以終其上令寡人有鑪枝蘭鼓其賈中純萬泉也願以為吾貧萌決其子息之數使無券契之責稱貸之家皆齊首而稽額曰君之憂萌至於此請再拜以獻堂下桓公曰不可子使吾萌春有以傳耜夏有以決芸寡人之德子無所寵若此而不受寡人不得於心故稱貸之家曰皆再拜受所出棧臺之職未能參千純也而決四方子息之數使無券契之責

四方之萌聞之父教其子兄教其弟曰夫墾田發務上之所患可以無庶乎君之憂我至於此此之謂反準管子曰昔者癸度居人之國必四面望於天下天下高亦高天下高我獨下必失其國於天下桓公曰此若言曷謂也管子對曰昔菜人善染練茈之於菜純錙綢綬之於菜亦純錙也其周中十金菜人知之聞綦茈空周且歛馬作見於菜人操之菜有推馬是自菜失綦茈而反準於馬也故可因者因之乘者乘之此因天下以制天下

此之謂國準桓公又曰寡人以定三君之居處矣

三君
杞邢

衛今又將何行管子對曰臣聞諸侯貪于利勿與分于

利君何不發虎豹之皮文錦以使諸侯令諸侯以縵帛

鹿皮報桓公曰諾於是以上虎豹皮文錦使諸侯諸侯以

縵帛鹿皮報則令因始行於天下矣又桓公曰仲父何

不遂交楚哉管子對曰不可楚人攻宋鄭燒燭熯焚鄭

地使城壞者不得復築也屋之燒者不得復葺也令人

有喪雌雄居屋如鳥鼠處穴要宋田夾塞兩川使水不

得東流東山之西水淺滅境四面百里而後可田也楚欲吞宋鄭思人衆兵強而能害己者必齊也是欲以文克齊以寶幣賂齊而齊自服故曰以文克齊而以武取宋鄭也楚取宋鄭

而不知禁是失宋鄭也禁之則是又不信于楚也知困於內兵困於外非善舉也桓公曰善然則若何管子對曰請興兵而南存宋鄭而令曰無攻楚言與楚王遇冬會曰至於遇上而以鄭城與宋水為請楚若許則是我以文令也楚若不許則遂以武令焉桓公曰善于是遂興

兵而南存宋鄭與楚王遇于召陵之上而令于遇上曰
無貯粟無曲堤無擅廢適子無置妾以為妻因以鄭城
與宋水為請于楚楚人不許遂退七十里而舍使軍人城
鄭南之地立百代城焉取其雖百代而無敢毀者曰自此而北至于

河者鄭自城之而楚不敢隳也東發宋田夾兩川使水
復東流而楚不敢塞也遂南伐及踰方城濟于汝水望
汶山汶音岷岷山江水所從出南致楚越之君而西伐秦北伐狄東
存晉君子于南晉之南故曰東存自伐秦而自存晉於北伐孤竹還存燕山

兵車之會六乘車之會三九合諸侯反位為已霸修鐘
磬而復樂管子曰此臣之所謂樂也又桓公問於管子
曰代國之出何有管子對曰代之出狐白之皮公其貴
買之管子曰狐月應陰陽之變六月而一見公貴買之
代人忘其難得喜其貴賈必相率而求之則是齊金錢
不必出代民民必去其本而居山林之中離枝間之必
侵其北離枝侵其北代必歸於齊公因令齊載金錢而
往桓公曰諾即令中大夫王師北將人徒載金錢之代

谷之上求狐白之皮代王聞之即告其相曰代之所以
弱於離枝者以無金錢也今齊乃以金錢求狐白之皮
是代之福也子急令民求狐白之皮以致齊之幣寡人
將以來離枝之民代人果去其本處山林之中求狐白
之皮二十四月而不得一離枝聞之則侵其北代王聞
之大恐則將其士卒保於代谷之上離枝遂侵其北王
即將其士卒顧以下齊齊未亡一錢幣使修三年而代
服桓公又問於管子曰吾欲制衡山之術為之奈何管

子曰公其令人貴買衡山之械器而賣之燕代必從公而買之秦趙聞之必與公爭之衡山之械器必倍其賈天下爭之衡山械器必十倍以上公曰諾因令人之衡山求買械器不敢辨其賈齊修械器於衡山十月燕代聞之果令人之衡山求買械器燕代修三月秦國聞之果令人之衡山求買械器衡山之君告其相曰天下爭吾械器令其賈再什以上衡山之民釋其本修械器之巧齊即令隰朋漕粟於趙趙糴十五隰朋取之石五十

天下聞之載粟而之齊齊修械器十七月修羅五月即
閉關不與衡山通使燕代秦趙即引其使而歸衡山械
器盡魯削衡山之南齊削衡山之北內自量無械器以
應二敵即奉國而歸齊矣又桓公問曰夫軍令則寄諸
內政矣齊國寡甲兵為之若何管子對曰輕過而移諸
甲兵制重罪贖以犀甲一戟輕罪死罪犀皮可為甲
輕罪贖以犢盾一戟輕罪劓刑之屬犢
犢綬華有文如犢小罪謫以金分
小罪不入五刑者以金贖有分兩之差今之罰金是也
書曰金作贖刑宥閒罪宥赦也間刑罰之

疑者尚書曰五索訟者三禁而不可上下坐成以束矢
刑之疑有赦求也求訟者之情三禁禁之三日使審實其辭不可
上下辭定不可移也坐成獄訟之坐已成也十二矢為
束矢取往而不反周禮以兩造
某民訟入束矢于朝然後聽之美金以鑄戟劍鑄試諸
狗馬狗馬難為利者惡金以鑄鉏夷斤鑄惡粗夷平也所以削草平地也形似鉏
而小鑄試諸壤土則甲兵大足也

王繆秦繆公內史也戎將由余使秦秦繆公問之得失
之要對曰古有國者未嘗不以恭儉也失國者未嘗不
以驕奢也由余因論五帝三王之所以衰及至布衣之

士所以亡繆公然之於是告王繆曰鄰國有聖人敵國
之憂也由余聖人也將奈之何王繆曰夫戎王居僻陋
之地未嘗見中國之聲色也君遺之女樂以媯其志亂
其政其臣下必踈因為由余請緩期使其君臣有間然
後可圖繆公曰善乃使王繆以女樂二列遺戎王為由
余請緩期戎王大悅許之於是張酒聽樂日夜不休終
歲媯縱牛馬多死由余歸數諫不聽去之秦繆公迎拜
之上卿遂以并國十二辟地千里入云秦繆公見由余
悅而欲留之由余不

肯繆公以告蹇叔曰君以告史廖廖曰戎人不達于五音與五味君不若遣之繆公以女樂二人與良宰遺之宰謂膳宰戎王喜迷惑大亂飲酒盡夜不休由余驟諫不聽因怒而歸秦

屈瑕楚莫敖也楚伐絞軍其南門屈瑕曰絞小而輕輕則寡謀請無扞采樵者以誘之扞衛也從之絞人獲三十人獲楚也明日絞人爭出驅楚役徒于山中楚人坐其北門而覆諸山下坐猶守也覆設伏兵而待之大敗之為城下之盟而還

公孫偃魯大夫也齊師宋師伐魯次于郎公孫偃曰宋

師不整可敗也宋敗齊必還請擊之魯莊公弗許自雩門竊出蒙臯比而先犯之雩門魯南城門臯比虎皮公從之大敗宋師于乘丘齊師乃還

鬪廉楚大夫也屈瑕將盟貳軫

貳軫二國名

鄖人軍于蒲騷

將與隨絞州蓼伐楚師

鄖國在江夏雲杜縣東南有鄖城

蒲騷鄖邑絞國名州國在南

鄖華容縣東南蓼國今義陽棘陽縣東南湖陽城

莫敖患之

莫敖楚官名即屈瑕

鬪廉曰

鄖人軍其郊必不誠且日虞四邑之至也

虞度也四邑隨絞州蓼也

君次于郊郢以禦四邑

君謂屈瑕也郊郢楚地

我以銳師宵加于

鄭有虞心而恃其城

恃近其城

莫有鬪志若敗鄭師四邑

必離莫教曰盍請濟師於王

盍何不也

對曰師克在和

不在衆商周之敵君之所聞也

商紂也

周武王也傳

紂有德兆夷人成軍以出又何濟焉莫教曰卜之對曰卜以決

疑不疑何卜遂敗鄭師于蒲驤卒盟而還

荀息晉大夫也晉獻公欲伐虢荀息曰君何不以屈產

之乘垂棘之璧而借道乎虞也

荀息晉大夫屈邑產

公

駿馬垂棘出良璧

曰此晉國之寶也如受吾幣而不借吾道則如之何荀

曰此小國之所以事大國也

此謂望馬之屬

彼不借吾道必不

敢受吾幣如受吾幣而借吾道則是我取之中府而藏

之外府取之中廄而置之外廄也公曰宮之奇存焉宮

奇虞之賢大夫必不使受也苟息曰宮之奇之為人也達心而

懦懦弱又少長於君達心則其言畧

明達之人領要不言言則舉綱提其耳則

愚者不悟也懦則不能彊諫少長於君則君輕之且夫玩在

耳目之前而患在一國之後此中知以上乃能慮之臣

料虞公中知以下也公遂借道而伐虢宮之奇諫曰晉

國之使者其辭卑而幣重必不便於虞虞公弗聽遂受其幣而借之道宮之奇諫曰語曰唇亡則齒寒其斯之謂與語謗也挈其妻子以奔曹獻公亡號五年而後舉虞苟息牽馬操璧而前曰璧則猶是也而馬齒加長矣猶是言如故

先軫晉大夫也楚伐宋宋人使門尹般如晉師告急門尹般宋公曰宋人告急舍之則絕與晉告楚不許我欲戰矣齊秦未可若之何未肯戰先軫曰使宋舍我而賂齊秦

求救於秦

假借齊秦使為宋請

我執曹君而分曹衛之田

以賜宋人楚愛曹衛必不許也

不許齊

秦之請喜賂怒頑能無

戰乎

言齊秦喜得宋賂而怒楚之頑

公悅執曹伯分曹

衛之田以界宋人楚子使子玉去宋子玉使宛春告於

晉師曰請復衛侯而封曹臣亦釋宋之圍

衛侯未出境

宋已失位故子犯曰子玉無禮哉君取一臣取二

君取

釋宋圍惠晉侯臣取不可失矣

言可伐

二復曹衛為已功先軫曰子與之定人之謂禮楚一言而定三國我一言而亡之我則無禮

何以戰乎不許楚言是棄宋也救而棄之謂諸侯何將

言

為諸侯所怪楚有三施我有三怨怨讐已多將何以戰不如

私許復曹衛以攜之

私許二國使告絕于楚而後復之

攜離也

執宛春以怒楚

既戰而後圖之

須勝負決乃定計

公悅乃拘宛春於衛且私許

復曹衛曹衛告絕于楚子玉怒從晉師晉師退軍吏曰

以君辟臣辱也且楚師老矣何故退子犯曰師直為壯

曲為老豈在久乎微楚之惠不及此

重耳過楚楚成王有贈送之禮退

三舍辟之所以報也

一舍三十里初楚子云若返國何以報我故退三舍以報

背惠

食言以亢其讎亢猶當也我曲楚直其衆素飽不可謂老盈氣也益飽我退而楚還我將何求若其不還君退臣犯曲在彼矣退三舍楚衆欲止子玉不可戰於莘北楚師敗績

狐偃晉大夫也楚子及諸侯圍宋宋公孫固如晉告急

公孫固宋先軫曰報施救患取威定霸於是乎在矣先

莊公孫晉下軍之佐原也原軫也報宋贈馬之施狐偃曰楚始得曹而新昏於衛若伐

曹衛楚必救之則齊宋免矣楚圍宋宋復告急于晉晉文公欲救則攻楚謂楚嘗

有德不欲伐也 欲釋宋宋又嘗有德于晉晉患之先軫
曰執曹伯分曹衛地以與宋楚急曹衛其勢宜釋宋於
是文公從之而楚成王乃引兵歸

師叔楚大夫潘庭也 楚伐庸自廬以往振廩同食往伐往庸

也振發也廩倉也同食上下無異饌也

次于句澨楚西界也使廬戢黎侵庸戢夫廬大及庸方城方城庸地上庸亭庸人逐之囚子揚窻戢黎官

三宿而逸曰庸師衆羣蠻聚焉不如復大師還復句澨戢屬

師且起王卒合而後進師叔曰不可姑又與之遇以驕

之彼驕我怒而後可克先君盼冒所以服陘隰也盼冒楚武

王諸父陘隰地名也又與之遇七遇皆北

軍走

曰北惟裨餗魚人實逐之

裨餗魚庸三邑魚魚復縣今巴東永安縣輕楚故但使三邑人逐之

庸人曰楚不足與戰矣

遂不設備楚子乘驛會師於臨品

驛傳車也

分為二隊

隊部也兩道攻之

子越自石溪子貝自仞以伐庸

子越關椒也石溪仞皆庸

道秦人巴人從楚師羣蠻從楚子盟

蠻見楚強政

遂滅庸

公孫申鄭大夫也晉人執鄭伯鄭人圍許公孫申謀之

曰我出師以圍許

示不為將改立君者而紓晉使也勿

亟遣使詣晉示欲更立君也晉必歸君明年晉歸鄭伯

仲孫蔑魯大夫孟獻子也襄公二年秋會晉荀罛宋華元衛孫林父曹人邾人于戚謀鄭故也

鄭人叛晉
謀計也

孟獻

子曰請城虎牢以逼鄭

虎牢舊鄭邑今屬晉

知武子曰善鄫之會

吾子聞崔子之言今不來矣

元年孟獻子與齊崔杼次于鄫崔杼有不服晉之言

獻子以滕薛小邾之不至皆齊故也

三國齊之屬

寡君之憂

不惟鄭

言復憂

罛將復於寡君而請于齊

以城事白晉君而請會之

欲以觀齊志

得請而告吾子之功也

得請謂齊人應命告諸侯會築虎牢若不

得請事將在齊

齊將伐

吾子之請諸侯之福也

以服鄭息城虎牢足

征伐 岂惟寡君賴之

傳言荀鑑
能用善謀

冬復會于戚齊崔武子及

滕薛小邾之大夫皆會知武子之言故也

武子言吾事
將在齊齊人

懼帥小國而會之 遂城虎牢鄭人乃成

如獻子之謀

慶虎陳大夫也楚子囊圍陳諸侯會陳侯于鄆以救之

晉會諸侯陳侯患楚 楚圍陳故慶虎慶寅謂楚人曰吾使公孫黃

往而執之

二慶陳執政大夫公子黃哀公弟

楚人從之

為執

二慶使告

陳侯于會

鄖之會

曰楚人執公子黃矣君若不來羣臣不

忍社稷宗廟懼有二圖

背君屬楚

陳侯逃歸

知武子晉大夫也諸侯伐鄭鄭人恐乃行成與晉成也中行

獻子曰遂圍之以待楚人之救也而與之戰不然無成

獻子荀偃也恐楚知武子曰許之盟而還師以敵楚人
救鄭鄭復屬之

敵罷吾三分四軍分四軍為三部與諸侯之銳以逆來者來者

於我未病楚不能矣晉各一動而楚猶愈於戰勝聚

骨以逞不可以爭言爭當以謀大勞未艾君子勞心小

人勞力先王之制也艾急也言當當勞諸侯皆不欲戰乃許

鄭成

子展鄭大夫也鄭人患晉楚之故諸大夫曰不從晉國幾亡幾近也楚弱於晉晉不吾疾也疾急也晉疾楚將辟之

何為而使晉師致死於我言當作何計也楚弗敢敵而後可固

與也

固與

子展曰與宋為惡諸侯必至吾從之盟楚師

至吾又從之則晉怒甚矣晉能驟來楚將不能乃固與

晉大夫說之使疆場之司惡於宋

使守疆場

之宋向戌

侵鄭大獲子展曰師而伐宋可矣若我伐宋諸侯之伐
我必疾吾乃聽命焉且告於楚楚師至吾又與之盟而

重賂晉師乃免矣

言如此乃免於晉楚之難

子展侵宋

欲以致諸侯

諸侯

伐鄭齊太子光宋向戌先至於鄭門於東門其莫晉荀

鑿至于西郊東侵舊許

許之舊國鄭新邑

衛孫林父侵其北鄙

諸侯會于北林師于向

向地在頴川長社縣東北

右還次于瑕

北行而西

為右還榮陽宛陵縣西有瑕侯亭

圍鄭觀兵于南門

觀示也

西濟于濟隧

水名鄭人懼乃行成

荀偃晉大夫中行獻子也衛侯出奔衛人立公孫剽晉

侯問衛故於中行獻子

問衛逐君當討否

對曰不如因而定之

衛有君矣

謂剽

之未可以得志而勤諸侯史佚有言

曰因重而撫之就撫安之仲虺有言曰亡者侮之亂者

重不可移

仲虺

湯君其定衛以待時乎

待其昏亂之時乃伐之

冬會於戚謀定衛也

定立剽

樂王尉晉大夫桓子也晉樂盈帥曲沃之甲因魏獻子

以晝入絳

獻子

魏舒

初樂盈佐魏莊子於下軍

莊子

魏

絳獻子

之獻子私焉故因之

私相親愛

趙氏以原屏之難怨樂氏

成

年莊姬

諱

之

韓趙方睦

韓起

讓趙

中行氏以伐秦之役

怨樂氏

十四年晉伐秦樂饗違

于中行偃命曰余馬首欲東而固與范氏和親

范宣子佐

中行偃知悼子少而聽於中行氏

悼子知鑿之子荀盈也少年十七知氏中

行氏同祖程鄭嬖於公

鄭亦荀氏宗

惟魏氏及七輿大夫與

七輿樂王鮒侍坐于范宣子或告曰樂氏至矣宣子

懼桓子曰奉君以走固宮必無害也且樂氏多怨子為

政樂氏自外子在內其利多矣既有利權又執民柄

賞罰

民將何懼焉樂氏所得其惟魏氏乎而可強取也夫

民爲民柄

克亂在權子無懈矣公有姻喪

夫人有杞喪

王鮒使宣子墨

繚冒經

晉自殺戰還遂常墨繚

二婦人輦以如公

恐樂氏有內應拒之故為婦人

服而

奉公以如固宮

固宮宮之有臺官備守者

叔孫豹魯大夫穆叔也襄公在楚楚康王卒楚人使公

親襚

望侯有遣使賜襚之禮今楚欲依遣使之禮

公患之穆叔曰祓殯而襚

則布幣也

先使巫祓除殯之凶而行禮與朝而布幣無異

乃使巫以桃茢先

祓殯楚人弗禁既而悔之

厨人濮宋厨邑大夫也華登以吳師救華氏

登前年奔吳

齊

烏枝鳴成宋

烏枝鳴聲大夫

厨人濮曰軍志有之先人有奪人之

心後人有待其哀盍及其勞且未定也伐諸若入而固則華氏衆矣悔無及也從之齊師宋師敗吳師于鴻口獲其二帥公子苦雉偃州員

冀芮晉大夫也晉獻公二十三年遂發賈華等伐屈

賈華

晉右行大夫屈潰夷吾將奔翟冀芮曰不可重耳已在矣今往

晉必移兵伐翟翟畏晉禍且及不如走梁梁近於秦秦

強吾君百歲後可以求入焉遂奔梁二十五年晉伐翟

翟以重耳故亦擊晉於翟桑翟桑地晉兵解而去晉既殺奚

齊卓子秦穆使公子繫弔公子重耳重耳再拜不稽首
起而哭退而不私繫退弔公子夷吾于梁如弔重耳之
命夷吾告冀芮曰秦人勤我矣冀芮曰公子勉之乎亡
人無狷潔狷潔不行重賂配德公子盡之無愛財人實
有之我以徼幸不亦可乎夷吾出見使者再拜稽首而
不哭退而私於公子繫曰中大夫里克與我矣吾命之
以汾陽之田百萬丕鄭與我矣吾命之以負蔡之田七
十萬君苟輔我蔑天命矣吾必遂矣亡人苟入掃除宗

廟定社稷亡人何國之與有君實有郡縣且入河外列城五豈謂君無有亦為君之東游津之上無有難急也亡人之所環挾纓瓌以望君之塵垢者黃金四十鑑白玉之珩六雙不敢當公子請納之左右公子繫反致命穆公曰吾與公子重耳重耳仁再拜不稽首不敢為後也起而哭愛其父也退而不私不沒於利也公子繫曰君之言過矣君若求置晉君而戴之置仁不亦宜乎君若求置晉君以成名於天下則不如置不仁以滑其中

且可以進退臣聞之仁有置武有置仁置德武置
服是故先置公子夷吾寔為惠公穆公問冀芮曰公子
誰恃於晉國對曰臣聞之亡人無黨有黨必有讐夷吾
之少也不好弄戲不過所復怒不及色及其長也弗改
是故出亡亦無惡於國而衆安之不然夷吾不佞其誰
能恃君子曰善以徵勸

張孟談趙臣也知伯帥趙魏而伐范中行氏滅之休數
年使人請地於韓韓康子欲勿與段規諫曰不可夫知

伯之為人也好利而鷙復來請地不與必加兵於韓矣君其與之與之彼狃又將請於他國他國不與必鄉之以兵然則韓可以免於患難而待事之變康子曰善使使者致萬家之邑一於知伯知伯悅又使人請地於魏魏宣子欲勿與趙葭諫曰彼請地於韓韓與之請地於魏魏弗與則是魏內自強而外怒知伯也然則其錯兵於魏必矣不如與之宣子曰諾因使人致萬家之邑一於知伯知伯悅又使人之趙請蔡臯狼之地趙襄子弗

與知伯因陰結韓魏將以伐趙趙襄子召張孟談而告之曰夫知伯之為人陽親而陰疎三使韓魏而寡人弗與焉其移兵寡人必矣今吾安居而可張孟談曰夫董閼安于簡子之才臣也世治晉陽而尹鐸循之其餘政教猶存其定居晉陽君曰諾乃使延陵君將車騎先之晉陽君因從之至行城郭案府庫視倉廩召張孟談曰吾城郭之完府庫足用倉廩實矣無矢奈何張孟談曰臣聞董子之治晉陽公宮之垣皆以狄蒿苦楚廬之其

高至丈君發而用之於是發而試之其堅則箇築之勁
不能過也君曰矢足矣吾銅少若何張孟談曰臣聞董子之
治晉陽也公宮之室皆以鍊銅為柱質請發而用之則
有餘銅矣君曰善號令以定備守以具三國之兵乘晉
陽城遂戰三月不能拔因緣軍而圍之決晉水而灌之
圍晉陽三年城中巢居而處懸釜而炊財食將盡士卒
羸病襄子謂張孟談曰糧食匱城力盡士大夫病吾不
能守矣欲以城下何如張孟談曰臣聞之亡不能存危

不能安則無為貴知士也君釋此計勿復言也臣請見
韓魏之君襄子曰諾張孟談於是陰見韓魏之君曰臣
聞唇亡則齒寒今知伯帥二國之君伐趙趙亡矣亡則
君為之次矣二君曰我知其然矣夫知伯之為人也麤
中而少親我謀未遂而知則禍必至為之奈何張孟談曰謀
出二君之口入臣之耳人莫之知也二君即與張孟談
陰約三軍與之期日夜遣入晉陽張孟談以報襄子襄
子再拜之張孟談因朝知伯而出遇知過一云知果轅門之

外知過入見知伯曰二主殆將有變君曰何如對曰臣遇張益談於轅門之外其志矜其行高知伯曰不然吾與二主約謹矣破趙三分其地寡人所親之必不欺也子釋之勿出諸口知過出見二主人說知伯曰二子色動而意變必背君不如令殺之知伯曰兵著晉陽三年矣旦暮當拔之而嚮其利乃有他心不可子慎勿復言知過曰不殺則遂親之知伯曰親之奈何知過曰魏宣子之謀臣曰趙葭韓康子之謀臣曰段規是皆能移其

君之計君其與二君約破趙則封二子者各萬家之縣
一如是則二主之心不可變而君得其所欲矣知伯曰
破趙而三分其地又封二子者則吾所得者少不可知
過見君之不用也言之不聽出更其姓為輔氏遂去不
見張孟談聞之入見襄子曰臣遇知過於轅門之外其
視有疑臣之心入見知伯出更其姓今暮不擊必後之
矣襄子曰諾使張孟談見韓魏之君日夜期教守堤之
吏而決水灌知伯軍救水而亂韓魏翼而擊之襄子將

卒犯其前大敗知伯軍而禽知伯知氏盡滅惟輔氏存焉

段規韓臣也三晉已破知氏將分其地段規謂韓王曰分地必取成臯韓王曰成臯石澗之地也寡人無所用之段規曰不然臣聞一里之厚而動千里之權者地利也萬人之衆而破三軍者不意也王用臣言則韓必取鄭矣王曰善果取成臯至韓之取鄭也果從成臯始大伍員事吳吳子問於伍員曰初而言伐楚余知其可也

而恐其使余徃也又惡人之有余之功也今余將自有
之矣伐楚何如對曰楚執政衆而乖莫適任患若為三
師以肄焉肄猶勞也一師至彼必皆出彼出則歸彼歸則出
楚必道敝罷敝于道亟建以罷之也亟數多方以誤之既罷而
後以三軍繼之必大克之閩廬從之楚於是乎始病
文種越大夫也吳王夫差起師伐越越王勾踐起師逆
之江大夫種乃獻謀曰夫吳之與越惟天所授王其無
庸戰夫申胥華登簡服吳國之士於甲兵而未嘗有所

挫也一人善射百夫決拾勝未可成也夫謀必素見成事焉而後履之不可以授命王不如設戎約辭行成以喜其民以廣侈吳王之心吾以卜之於天天若棄吳必許吾成而不吾足也將必寬然有伯諸侯之心焉既罷弊其民而天奪之食安受其燼乃無有命矣越王許諾乃令諸稽郢行成于吳曰寡君勾踐使下臣郢不敢顯然布幣行禮敢私告於下執事曰昔者越國見禍得罪於天王天王親舉玉趾以心孤勾踐而又赦宥之君王

之於越也繫起死人而肉白骨也孤不敢忘天災其敢
忘君王之大賜乎今勾踐申禍無良草鄙之人敢忘天
王之大德而思邊垂之小怨以重得罪於下執事勾踐
用帥二三之老親任重罪頓願於邊今君王不察盛怒
屬兵將殘伐越國越國固貢獻之邑也君王不以鞭箠
使之而辱軍士使寇今焉勾踐請盟一介嫡女執箕帚
以晐姓於王宮一介嫡男奉盤匜以隨諸御春秋貢獻
不解於王府天王豈辱裁之亦征諸侯之禮也夫謗曰

狐埋之而狐搣之是以無成功今天王既封殖越國以名聞於天下而又刈亡之是天王之無成勞也雖四方之諸侯則何實以事吳敢使下臣盡辭惟天王秉利度義焉吳王夫差乃許越成

范蠡越大夫也越國大饑穀熟不王恐召范蠡而謀之蠡

曰王何患焉今之饑此越國之福而吳之禍也夫吳國甚富而財有餘其王年少智寡剽輕好須臾之名不思

後患其王吳王夫差王若重幣卑辭以請糴於吳則食可得也

王越王勾踐也

食得其糴必有吳而王何患焉

得其糴終必得吳國王何

憂王曰善乃使人請食於吳王將與之伍子胥諫曰不

可與也夫吳之與越接土鄰境道易人通仇讎敵國也

非吳喪越越必喪吳若燕秦齊魯山處陸居豈能踰五

湖九江越十七陂以有吳哉

踰渡也陂險也越歷也故曰非吳喪

越越必喪吳今將輸之粟與之食是長吾讎而養吾死

也財匱而民怨悔無及也不若勿與而攻之固其數也

數術此昔吾先王之所以霸且夫饑代事也
先王闔閭也代更也

猶淵之與陂誰國無有吳王曰不然吾聞之義兵不攻服仁者食饑餓今服而攻之非義兵餓而不食非仁者不仁不義雖得十越吾不為也遂與之不出三年而吳亦饑使人請食於越越王弗與乃攻之夫差為禽

陳軫與張儀俱事秦惠王皆貴重爭寵軫奔楚楚未之重也而使陳軫使於秦過梁欲見犀首犀首謝弗見軫曰吾為事來公不見軫軫將行不得待異日犀首見之陳軫曰公何好飲也犀首曰無事也曰吾請令公饜事

可乎曰奈何曰田需約諸侯從親楚王疑之未信也公謂於王曰臣與燕趙之王有故數使人來曰無事何不相見願謁行於王王雖許公公請勿多車以車三十乘可陳之於庭明言之燕趙燕趙客聞之馳車告其王使人迎犀首楚王聞之大怒曰田需與寡人約而犀首之燕趙是欺我也怒而不聽其事齊聞犀首之北使人以事委焉犀首遂行三國相事皆斷於犀首軫遂至秦韓魏相攻期年不解秦惠王欲救之間於左右左右或曰

救之便或曰勿救便惠王未能為之次陳軫適至秦惠
王曰子去寡人之楚亦思寡人不陳軫對曰王聞夫越
人莊舄乎王曰不聞曰越人莊舄仕楚執珪有頃而病
楚王曰舄故越之鄙細人也今仕楚執珪富貴矣亦思
越不中謝對曰凡人之思故在其病也彼思越則越聲
不思越則楚聲使人徃聽之猶尚越聲也今臣雖棄逐
之楚豈能無秦聲哉惠王曰善今韓魏相攻期年不解
或謂寡人救之便或曰勿救便寡人不能決願子為子

主計之餘為寡人計之陳軫對曰亦嘗有以夫卞莊子刺虎聞於王者乎莊子欲刺虎館豎子止之曰兩虎方且食牛食甘必爭爭則必鬪鬪則大者傷小者死從傷而刺之一舉必有雙虎之名卞莊子以為然立須之有頃兩虎果鬪大者傷小者死從傷者而刺之一舉果有雙虎之功今韓魏相攻期年不解是必大國傷小國亡從傷而伐之一舉必有兩實此猶莊子刺虎之類也臣主與王何異也惠王曰善卒弗救大國果傷小國亡秦

興兵而伐大寇之此陳軫之計也

張儀事秦惠王王欲發兵以伐蜀以為道險狹難至而
韓又來侵秦秦惠王欲先伐韓後伐蜀恐不利欲先伐
蜀恐韓襲秦之敝猶豫未能決司馬錯與張儀爭論於
惠王之前司馬錯欲伐蜀張儀曰不如伐韓王曰請聞
其說儀曰親魏善楚下兵三川塞什谷之口徐廣曰一作尋成臯

鞏縣有尋口

當屯留之道魏絕南陽楚臨南鄭秦攻新城宜

陽以臨二周之郊誅周王之罪侵楚魏之地周自知不

能救九鼎寶器必出據九鼎按圖籍挾天子以令於天下莫敢不聽此王業也今夫蜀西僻之國而戎翟之倫也敵兵勞衆不足以成名得其地不足以為利臣聞爭名者於朝爭利者於市今三川周室天下之朝市也而王不爭焉顧爭於戎翟去王業遠矣司馬錯曰不然臣聞之欲富國者務廣其地欲強兵者務富其民欲王者務博其德三資者備而王隨之矣今王地小民貧故臣願先從事於易夫蜀西僻之國也而戎翟之長也

有桀紂之亂以秦攻之譬如使豺狼逐羣羊得其地足以廣國取其財足以富民繕兵不傷衆而彼已服焉拔一國而天下不以為暴利盡西海而天下不以為貪是我一舉而名實附也而人有禁暴止亂之名今攻韓劫天子惡名也而未必利也又有不義之名而攻天下所不欲危矣臣請論其故周天下之宗室也齊韓之與國也周自知失九鼎韓自知亡三川將二國并力合謀以因乎齊趙而求解乎楚魏以鼎與楚以地與魏王不能

止也此臣之所謂危也不如伐蜀完惠王曰善寡人請聽子卒起兵伐蜀十月取之遂定蜀貶蜀王更號為侯而使陳莊相蜀蜀既屬秦秦以益強富厚輕諸侯儀又以商於六百里地詐楚懷王後秦要楚欲得黔中地欲以武關外易之楚王曰不願易地願得張儀而獻黔中地秦王欲遣之口弗忍言張儀乃請行惠王曰彼楚王怒子之負以商於之地是且甘心於子張儀曰秦强楚弱臣善靳尚尚得事楚夫人鄭袖所言皆從且臣奉王

之節使楚楚何敢加誅假令誅臣而為秦得黔中之地
臣之上顧遂使楚楚懷王至則囚張儀將殺之靳尚謂
鄭袖曰秦王甚愛張儀而不欲出之今將以上庸之地
六縣賂楚以美人聘楚以宮中善謳歌者為媵楚王重
地尊秦秦女必貴而夫人斥矣不若為言而出之於是
鄭袖日夜言懷王曰人臣各為其主用今地未入秦秦
使張儀來至重王王未有禮而殺張儀秦必大怒攻楚
妾請子母俱遷江南母為秦所魚肉也懷王後悔赦張

儀厚禮之如故

段干朋齊臣也魏惠王圍邯鄲趙求救於齊齊威王召大臣而謀曰救趙孰與勿救騶忌子曰不如勿救段干朋曰不救則不義且不利威王曰何也對曰夫魏氏并邯鄲其於齊何利哉且夫救趙而軍其郊是趙不伐而魏全也故不如南攻襄陵以弊魏邯鄲拔而乘魏之弊威王從其計

無忌魏公子也齊楚相約而攻魏秦昭王救之魏王以

秦救之故欲親秦而伐韓以求故地無忌謂魏王曰秦與戎翟同俗有虎狼之心貪戾好利無信不識禮義德行苟有利焉不顧親戚兄弟若禽獸耳此天下之所識也非有所施厚積德也故太后母也而以憂死穰侯舅也功莫大焉而竟逐之兩弟無罪而再奪之國此於親戚若此而況於仇讐之國乎今王與秦共伐韓而益近秦患臣甚惑之而王不識則不明羣臣莫以聞則不忠今韓氏以一女子奉一弱主內有大亂外交強秦魏之

兵王以為不亡乎韓亡秦有韓地與大梁鄰王以為安
乎王欲得其故地今負强秦之親王以為利乎秦非無
事之國也韓亡之後必將更事更事必就易與利就易
與利必不伐楚與趙矣是何也夫越山踰河絕韓上黨
而攻強趙是復闊與之事秦必不為也若道河內倍鄴
朝歌絕漳滏水與趙兵決於邯鄲之郊是知伯之禍也
秦又不敢伐楚道涉山谷行三千里而攻冥阨之塞之楚之險塞也徐廣曰或以為今江夏郡縣所行甚遠所攻甚難秦又不為也若

道河外倍大梁右蔡左召陵與楚兵決陳郊秦又不敢
故曰秦必不伐楚與趙矣又不攻衛與齊矣夫韓亡之
後兵出之日非魏無攻已秦固有懷茅在修武縣
縣有茅亭邢丘在平城境津以臨河內河內共汲必危汲縣屬
河內有鄭地在卷縣屬魏地卷縣屬雍垣垣縣又有長城經陽武到密者也決滎
成臯滎陽陽城在卷縣屬魏地卷縣屬鄭得垣亦屬鄭

澤水灌大梁大梁必亡王之使者出過而惡安陵氏於秦
召陵有安陵郡征羌有安陵亭也秦之欲誅之久矣秦葉陽昆陽與舞
陽鄰聽使者之惡之隨安陵氏而亡之繞舞陽之北以

東臨許南國必危國無害已夫憎韓不愛安陵氏可也

夫不患秦之不愛南國非也異日者秦在河西晉國去

梁千里

魏國之界千里又云河南梁縣有注城

有河山以闌之有周韓以

間之從林鄉軍

林鄉在宛縣

以至於今秦七攻魏五入圍中

一作邊城盡拔文臺墮垂都

一云魏山都句陽有垂亭焚林木伐麋

鹿盡而國繼以圍又長驅梁北東至陶衛之郊北至平

監

平縣屬河南平或作乎字史記齊閼止作監字閼在東平須昌縣

所亡於秦者山南

山北河外河內大縣數十

一作百名都數百

一作十秦乃在

河西晉去梁千里而禍若是矣又況於使秦無韓有鄭
地無河山而闡之無周韓而間之去大梁百里禍必繇
此矣異日者從之不成也楚魏疑而韓不可得也今韓
受兵三年秦撓之以講識亡不聽投質於趙請為天下
雁行頓刃楚趙必集兵皆識秦之欲無窮也非盡亡天
下之國而臣海內必不休矣是故臣願以從事王王速
受楚趙之約趙挾韓之質以存韓而求故地韓必効之
此士民不勞而故地得其功多於與秦共伐韓而又免

與彊秦鄰之禍也夫存韓安魏而利天下此亦王之天時已通韓上黨於其甯朝歌有甯鄉使道安城出入賦之是魏

重質韓以其上黨也今有其賦足以富國韓必德魏愛魏重魏畏魏韓必不敢反魏是韓則魏之縣也魏得韓以為縣大梁河外必安矣今不存韓二周安陵必危楚趙大破衛齊甚畏天下西鄉而馳秦入朝而為臣不久矣

虞卿為趙上卿秦趙戰於長平趙不勝亡一都尉趙王

召樓昌與虞卿曰軍戰長平不勝尉復死

復一作孫

寡人使

束甲而趨之何如樓昌曰無益也不如發重使為媾

古后

切求和虞卿曰昌言媾者以為不媾軍必破也而制媾

古后

者在秦且王之論秦也欲破趙之軍乎不邪王曰秦不

遺餘力矣必且欲破趙軍虞卿曰王聽臣發使出重寶

以附楚魏楚魏欲得王之重寶必內吾使趙使入楚魏

秦必疑天下之合從且必恐如此則媾乃可為也趙王

不聽與平陽君為媾發鄭朱入秦秦內之趙王召虞卿

曰寡人使平陽君為媾於秦秦已內鄭朱矣卿以為奚
如虞卿對曰王不得媾軍必破矣天下賀戰勝者皆在
秦矣鄭朱貴人也入秦秦王與應侯必顯重以示天下
楚魏以趙為媾必不救王秦知天下不救王則媾不可
得成也應侯果顯鄭朱以示天下賀戰勝者終不肯媾
長平大敗遂圍邯鄲為天下笑秦解邯鄲圍而趙王入
朝使趙郝約事於秦割六縣而媾虞卿謂趙王曰秦之
攻王也倦而歸乎王以其力尚能進愛王而弗攻乎王

曰秦之攻我也不遺餘力矣必以倦而歸也虞卿曰秦以其力攻其所不能取倦而歸王又以其力之所不能取以送之是助秦自攻也來年秦復攻王王無救矣王以虞卿之言告趙郝趙郝曰虞卿誠能盡秦力之所至乎誠知秦力之所不能進此彈丸之地弗與秦來年復攻王王得無割其內而媾乎王曰請聽子割矣子能必使來年秦之不復攻我乎趙郝對曰此非臣之所敢任也他日三晉之交於秦相善也今秦善韓魏而攻王王之

所以事秦必不如韓魏也今臣為足下解負親之攻開
關通幣齊交韓魏至來年而王獨取攻於秦此王之所以事秦必在韓魏之後也此非臣之所敢任也王以告虞卿虞卿曰郝言不媾來年秦復攻王王得無割其內而媾乎今媾郝又以不能必秦之不復攻也今雖割六城何益來年復攻又割其力之所不能取而媾此自盡之術也不如無媾秦雖善攻不能取六縣趙雖不能守終不失六城秦倦而歸兵必罷我以六城收天下以

攻罷秦是我失之於天下而取償於秦也吾國尚利孰與坐而割地自弱以強秦哉今郝曰秦善韓魏而攻趙者必以為韓魏不救趙也而王之軍必孤又以王之事秦不如韓魏也是使王歲以六城事秦也即坐而城地盡來年秦復求割地王將與之乎弗與是棄前功而挑秦禍也與之則無地以給之語曰強者善攻弱者不能守今坐而聽秦秦兵不弊而多得地是強秦而弱趙也以益強之秦而割愈弱之趙其計固不止矣且王之地

有盡而秦之求無已以有盡之地而給無已之求其勢必無趙矣趙王計未定樓緩從秦來趙王與樓緩計之曰予秦地何如毋予孰吉緩辭讓曰此非臣之所能知也王曰雖然試言公之私樓緩對曰王亦聞夫公甫文伯母乎公甫文伯仕於魯病死女子為自殺於房中者二人其母聞之弗哭也其相室曰焉有子死而弗哭者乎其母曰孔子聖人也遂於魯而是人不隨也今死而婦人為之自殺者二人若是者必其於長者薄而於婦

人厚也故從母言之是為賢母從妻言之是必不免為
妬妻故其言一也言者異則人心變矣今臣新從秦來
而言勿予則非計也言予之恐王以臣為為秦也故不
敢對使臣得為大王計不如予之王曰諾虞卿聞之入
見王曰此飾說也王脊音慎勿予樓緩聞之徃見王王又
以虞卿之言告樓緩樓緩對曰不然虞卿得其一不得
其二夫秦趙構難而天下皆說何也曰吾且因強而乘
弱矣今趙兵困於秦天下之賀戰勝者則必盡在於秦

矣故不如亟割地為和以疑天下而慰秦之心不然天
下將因秦之強怒乘趙之弊瓜分之趙且亡矣何秦之
圖乎故曰虞卿得其一不得其二願王以此決之勿復
計也虞卿聞之往見王曰危哉樓子之所以為秦者是
愈疑天下而何慰秦之心哉獨不言其示天下弱乎且
臣言勿予者非固勿予而已也秦索六城於王而王以
六城賂齊齊秦之深讎也得王之六城并力西擊秦齊
之聽王不待辭之畢也則是王失之於齊而取償於秦

也而齊趙之深讎可以報矣而示天下有能為也王以此發聲齊兵未窺於境臣見秦之重賂至趙而反媾公王也從秦為媾韓魏聞之必盡重王重王必出重寶以先於王則是王一舉而結三國之親而與秦易道也趙王曰善則使虞卿東見齊王與之謀秦虞卿未返而秦使者已在趙矣樓緩聞之亡去趙於是封虞卿以一城虞卿又謂趙王曰人之情寧朝人寧朝於人乎趙王曰寧朝人耳何故寧朝於人虞卿曰夫魏為從主而違者

范痤也今王能以百里之地君萬戶之都請殺范痤痤
死則從事可移於趙趙王曰善乃使人以百里之地請
殺范痤於魏魏主許諾使司空執范痤而未殺也痤獻
書魏主曰臣聞趙王以百里之地請殺痤之身也夫殺
無罪痤薄故也而得百里之地大利也臣竊為大王美
之雖然而有一焉百里之地大可得而死者不可復生
也則王必為天下笑也臣竊以為與其死人市不若以
生人市便也又遺其後相信陵君一作信安君書曰夫趙魏

敵戰之國也趙王以咫尺之書來而魏王輕為之殺無
罪之痤痤雖不肖故魏之免相也嘗以魏之故得罪於
趙夫國內無用臣外雖得地勢不能守然今能用魏者
莫如君矣王聽趙殺痤之後強秦襲趙之欲倍趙之割
君將何以止之此君之累也信陵君曰諾遽言之王而
出之

孫賓齊臣也魏伐趙趙與韓親共擊魏趙不利戰於南
梁宣王召田忌復故位韓氏請救於齊宣王召大臣而

謀曰蚤救孰與晚救驕忌子曰不如勿救田忌曰弗救
則韓且折而入於魏不如蚤救之孫臏曰夫韓魏之兵
未弊而救之是吾代韓受魏之兵顧反聽命於韓也且
魏有破國之志韓見亡必東面而懇於齊矣吾因深結
韓之親而晚承魏之弊則可重利而得尊名也宣王曰
善乃陰告韓之使者而遣之韓因恃齊五戰不勝而東
委國於齊齊因起兵使田忌嬰一作盼將孫子為師救
韓趙以擊魏大敗之馬陵殺其將龐涓虜魏太子申入云

南梁之難韓氏請救于齊田侯召大臣而謀曰早救之孰與晚救之便張丐對曰晚救之韓且折而入于魏不如蚤救之田忌曰不可夫韓魏之兵未弊而我救之是我也代韓而受魏之兵顧反聽命于韓也且夫魏有破韓之志韓見且亡必東懇于齊我因陰結韓之親而晚承魏之弊則國可重利可得名可尊矣田侯曰善乃陰告韓使者而遣之韓自以專有齊國五戰五不勝東懇于齊齊因起兵擊魏大敗之馬陵魏破韓弱韓魏之君因田嬰北面而朝田侯田侯齊宣王也

樂毅為燕亞卿當是時齊湣王強南敗楚相唐昧於重丘西摧三晉於觀津遂與三晉擊秦助趙滅中山破宋廣地千餘里與秦昭王爭重為帝已而復歸之諸侯皆

欲背秦而服於齊湣王自矜百姓弗堪於是昭王問伐齊之事樂毅對曰齊霸國之餘業也地大人衆未易獨攻也王必欲伐之莫如與趙及楚魏於是使樂毅約趙惠文王別使連楚魏令趙閻秦閻進說之意以伐齊之利諸侯害齊湣王之驕暴皆爭合從與燕伐齊樂毅還報燕昭王悉起兵使樂毅為上將軍

惠施魏臣也齊魏戰於馬陵齊大勝魏殺太子申覆十萬之軍魏王召惠施而告之曰夫齊寡人之讎也怨之至死不

忘國雖小吾嘗欲悉起兵而攻之何如對曰不可臣聞之王者得度而霸者知計今王所以告臣者疏於度與計王固先屬怨於趙而後與齊戰今戰不勝國無守戰之備王又欲起而攻齊此非臣之所諭也王若欲報齊乎則不如因變服折節而朝齊楚王必怒矣王游人而令其鬪則楚必伐齊以休楚而伐罷齊則必為楚禽矣是王以楚毀齊也王曰善乃使人報於齊願臣畜而朝田嬰許諾張母曰不可戰不勝魏而得朝禮與魏和而下楚此可以

大勝也今戰勝魏覆十萬之軍而禽太子申臣萬乘之
魏而卑秦楚此其暴戾定矣且楚王之為人也好用兵
而甚務名終為齊患者必楚矣田嬰不聽遂內魏王而
與之並朝齊使再至趙氏醜之楚王怒自將而伐齊趙
應之大敗齊於徐州



欽定四庫全書

卷七百三十六

冊府元龜卷七百三十六

欽定四庫全書

子部

冊府元龜卷七百三十七至四十

詳校官中書臣吳瓊

侍讀臣孫球覆勘

總校官庶吉士臣何思鈞

校對官主簿臣汪日贊

謄錄監生臣張鴻烈

欽定四庫全書

冊府元龜卷七百三十七 宋 王欽若等 撰

陪臣部

薦賢 賢德

薦賢

夫十室之邑必有忠信二人同行厥有我師舉爾所知
惟君子之不比各於其黨見士庶之相讓若乃春秋務
戰之世敵國急賢之際而有處大夫之列挾霸王之術

以尊其主者何嘗不勤接士類汲引材智推轂靡遺於後進拔茅乃至于彙征大則讓卿宰之位小則備家陪之列或以素敦友善夙知隱滯或以方在羈旅久為僕御並加推獎俾之效用至於舉讎取盜曾無嫌間自非深於知人忠於事上者其能若是乎

鮑叔牙齊大夫也桓公使為宰宰太辭曰臣君之儔臣宰也也君加惠于臣使不凍餓則君之賜也若必治國家者則非臣之所能也其惟管夷吾乎臣之所不如管夷吾

者有五寬惠愛民臣不如也治國家不失其秉臣不如

也

秉柄也 柄所操以作事國
柄者賞罰之紀要故也

忠信可結於諸侯臣不如

也制禮義可法於四方臣不如也執枹鼓立於軍門使

百姓皆加勇焉臣不如也夫管子民之父母將欲治其

子不可棄其父母公曰夫管夷吾射寡人中鈞殆於死

今乃用之可乎鮑叔對曰彼為其君動也君若宥而反

之其為君猶是也桓公遂任以政

管仲相齊三月請論百官桓公曰諾管仲曰升降揖讓

進退閑習辯辭之剛柔臣不如隰朋請立以為大行聖
草入邑辟土聚粟多衆盡地之利臣不如寧戚請立以
為司田平原廣牧廣遠可牧之地車不結轍士不旋踵鼓之而

三軍之士視死如歸臣不如王子城父請立以為大司

馬決獄折中不殺不辜不輕有罪臣不如賓胥無請立
以為大司理犯君顏色進諫必忠不避死亡不撓富貴

臣不如東郭牙請立以為大諫之臣此五子者夷吾一

不如於五子者各以五子之能易其一然而以易夷吾夷吾不為也

夷吾之德則夷吾所以不能

夷

君若欲治國強兵則五子者存矣若欲

霸王夷吾在此桓公曰善孔子曰管仲遇盜取二人焉

上以為公臣曰其所與遊者僻也可人也

言此人可也但居惡人之中使

人犯管仲死桓公使為之服宦於大夫者之為之服也

自管仲始也有君命焉爾也

亦記失禮所由也善桓公不忘賢者之舉宦猶仕也

此仕于大夫連升于公與為大夫之諸侯同爾禮不反服

佚之狐鄭大夫晉文公與秦伯圍鄭佚之狐言於鄭伯曰國危矣若使燭之武見秦君師必退

燭之武亦鄭大夫

之辭曰臣之壯也猶不如人今老矣無能為也已公曰吾不能蚤用子今急而求子是寡人之過也然鄭亡子亦有不利焉許之夜缒而出見秦伯秦師乃還

臼季晉大夫使過冀見冀缺耨其妻饁之

臼季胥臣也
冀晉邑耨鋤

也野饁敬相待如賓與之歸言諸文公曰敬德之聚也

能敬必有德德以治民君請用之臣聞之出門如賓

如見

大承事如祭常敬謹也仁之則也公曰其父有罪可乎

缺父冀芮

賓欲殺文公對曰舜之罪也殛鯀其舉也興禹禹鯀管敬仲桓

之賊也實相以濟康誥曰父不慈子不祗兄不友弟不恭不相及也祗敬詩曰采葑采菲無以下體君取節焉可也葑菲之菜上善下惡食之者不以其惡而棄其善言可取其善節文公以為下軍大夫

百里奚秦大夫初仕虞虞亡走宛秦繆公以五羖羊皮贖之授之國政號曰五羖大夫百里奚讓曰臣不及臣友蹇叔蹇叔賢而世莫知臣嘗游困於齊而乞食餌人餌一作姪蹇叔收臣臣因而欲事齊君無知蹇叔止臣臣得

脫齊難遂之周周王子穎好牛臣以養牛干之及穎欲用臣蹇叔止臣臣去得不誅事虞君蹇叔止臣臣知虞君不用臣臣誠私利祿爵且留再用其言得脫一不用及虞君難是以知其賢於是穆公使人厚幣迎蹇叔以為上大夫

虞丘相為楚相孫叔敖者楚之處士也虞丘相進之於楚莊王以自代

趙文子趙武也為晉大夫所舉於晉國管庫之士七十有

餘家

管庫之士府史以下官長所置也舉之於君以為士大夫也管鍵也庫物所藏晉平公過

九原而歎曰嗟呼此地之蘊吾良臣多矣若使死者起

也吾將與誰歸乎叔向對曰趙武平平公曰子黨於子

之師也對曰臣敢言趙武之為人也立若不勝衣言若

不出於口然其身舉士於白屋下者四十六人皆得其

意而公家甚賴之及文子之死也四十六人皆就賓位

是其無私德也臣故以為賢也平公曰善夫趙武賢臣

也相晉天下無兵革者九年春秋曰晉趙武之力盡得

人也

司馬侯為晉大夫悼公與之升臺而望曰樂夫對曰臨下之樂則樂矣德義之樂則未公曰何謂德義對曰諸侯之為日在君側以其善行以其惡戒可謂德義矣公

曰孰能對曰羊舌肸習於春秋乃召叔向使傳太子彪

祁奚為晉大夫請老老致仕也問嗣焉嗣續其職者稱解狐其讎

也將立之而卒解狐卒又問焉對曰午也可午祁於是羊

舌職死矣晉侯曰孰可以代之對曰赤也可赤職之於子伯華於

是使祁午為中軍尉羊舌赤佐之

各代

其父

君子謂祁奚於

是能舉善矣稱其讎不為諂立其子不為比舉其偏不

為黨

諂也偏
媚屬也

周書曰無偏無黨王道蕩蕩

蕩蕩平
正無私

其

祁奚之謂矣解狐得舉

未得位故
曰得舉

祁午得位伯華得官

建一官而三物成

一官軍尉
物事也

能舉善也夫惟善故能舉

其類詩云惟其有之是以似之祁奚有焉

言惟有德之
人能舉似已

者

趙盾為晉大夫

趙盾宣
子也

言韓獻子於靈公

獻子韓
厥也

以為

司馬河曲之役趙孟使人以其乘車行獻子執而戮之
衆咸曰韓厥必不沒矣其主朝升之而暮戮其車其誰
安之宣子召而禮之曰吾聞事君者比而不黨夫周以
舉義比也舉以其私黨也夫軍事無犯犯而不隱義也
吾言汝於君懼汝不能也舉而不能黨孰大焉勉之臨
長晉國者非汝其誰皆告諸大夫曰二三子可以賀我
矣吾舉厥也而中吾乃今知免於罪也

公叔文子為衛大夫薦其家臣僎與文子同升諸公僎本

文子家臣薦之使與己並為大夫同升在公朝上孔子聞之曰可以為文矣

言行

如是可
謚為文

晏嬰為齊相景公時晉伐阿鄄而燕侵河上齊師敗績

景公患之晏嬰薦田穰苴曰穰苴雖田氏庶孽

司馬穰苴者田

完之苗也然其人文能附衆武能威敵願君試之景公召

穰苴與語兵事大說之以為將軍嬰嘗出其御之妻從

門間而闖其夫其夫為相御擁大蓋策駟馬意氣揚揚

甚自得也既而歸其妻請去夫問其故妻曰晏嬰長不

滿六尺身相齊國名顯諸侯今者妾觀其出志念深矣常有以自下者今子長八尺乃為人僕御然子之意自以為足妾是以求去也其後夫自抑損晏子怪而問之御以實對晏子薦以為大夫

魏冉為秦相舉白起使代向壽將而攻韓魏敗之伊闢斬首二十四萬虜魏將公孫喜明年又取楚之宛葉

公仲連為趙烈侯相國烈侯好音謂公仲連曰寡人有愛可以貴之乎公仲連曰富之可貴之則否烈侯曰然

夫鄭歌者槍石二人吾賜之田八萬畝公仲曰諾不與

居一月烈侯從代來問歌者田公仲曰求未有可者有

頃烈侯復問公仲終不與乃稱疾不朝蕃吾君

蕃音盤
常山有縣

吾自代來謂公仲曰君實好善而未知所持今公仲

相趙於今四年亦有進士乎公仲曰未也蕃吾君曰牛

畜荀欣徐越皆可公仲乃進三人及朝烈侯復問歌者

田何如公仲曰方使擇其善者牛畜侍烈侯施以仁義
約以王道烈侯迺然明日荀欣侍以選練舉賢任官使

能明日徐越侍以節財儉用察度功德所與無不充君說烈侯使使謂相國曰歌者之田且止官牛畜為帥荀欣為中尉徐越為內史賜相國衣二襲平復具為一襲

趙勝封平原君趙奢者趙之田部吏也平原君以為賢言之於王王用之治國賦國賦大平民富而府庫實田忌為齊大夫孫臏至齊田忌善而客待之進於威王威王問兵法遂以為帥大破梁軍

貂勃為齊大夫常惡安平君田單小人也安平君聞之故

為酒而召貂勃曰單何以得罪於先生故常見譽於朝
貂勃曰跖之狗吠堯非貴跖而賤堯也狗固吠非其主
也且今使公孫子賢而徐子不肖然而公孫子與徐子
鬪徐子之狗由將攫公孫子之腓而噬之也若乃得去
不肖者而為賢者狗豈得攫其腓而噬之哉安平君曰
敬聞命明日任之於王王有所幸臣九人之屬傷安平
君相與語於王曰燕之伐齊之時楚王使將軍將萬人
而佐齊今國已定而社稷已安矣何不使使者謝於楚

王王曰左右孰可九人之屬曰炤勃可炤勃使楚

李克為魏大夫文侯謂李克曰先生嘗教寡人家貧則

思良妻國亂則思良相今所置非成則璜璜翟璜也
成文侯弟二

子何如李克對曰臣聞之卑不謀尊疎不謀戚臣在閨門之外不敢當命文侯曰先生臨事勿讓李克曰君不察故也居視其所親富視其所與達視其所舉窮視其所不為貧視其所不取五者足以定之矣何待克哉文侯曰先生就舍寡人之相定矣李克趨而出過翟璜之

家璜曰今者聞君召先生而卜相果誰為之乎李克曰
魏成子為相矣翟璜忿然作色曰以耳目之所覩記臣
何負於魏成子西河之守臣之所進也君內以鄴為憂
臣進西門豹君謀欲伐中山臣進樂羊中山已拔無使
守之臣進先生君之子無傳臣進屈侯鮒臣何負於魏
成子克曰且子之言克於子之君者豈將比周以求大
官哉君問置相非成則璜二子何如克對曰君不察故
也居視其所親富視其所與達視其所舉窮視其所不

為貧視其所不取五者足以定之矣何待克哉是以知
魏成子之為相也且子安得與魏成子比乎魏成子食
祿千鍾什九在外什一在內是以東游得卜子夏田子
方段干木此三人者君皆師之子之所進五人者君皆
臣之子惡得與魏成子比也翟璜逡巡再拜曰璜鄙人
也失對願卒為弟子

鄭安平魏人范睢旣為魏齊笞擊得出後魏齊悔復召
求之安平聞之乃遂操范睢亡伏匿更名姓曰張祿當

此時秦昭王使謁者王稽於魏鄭安平詐為卒侍王稽
王稽問魏有賢人可與俱西游者乎鄭安平曰臣里中
有張祿先生欲見君言天下事其人有仇不敢晝見王
稽曰夜與俱來鄭安平夜與張祿見王稽語未究王稽
知范睢賢謂曰先生待我於三亭之南與私約而去王
稽辭魏去過載范睢入秦至湖關望見車騎從西來范
睢曰彼來者為誰王稽曰秦相穰侯東行縣邑范睢曰
吾聞穰侯專秦權惡內諸侯客此恐辱我我寧且匿車

中有頃穰侯果至勞王稽因立車而語曰關東有何變曰無有又謂王稽曰謁君得無與諸侯客子俱來乎無益徒亂人國耳王稽曰不敢即別去范雎曰吾聞穰侯智士也其見事遲鄉者疑車中有人忘索之於是范雎下車走曰此必悔之行十餘里果使騎還索車中無客乃已王稽遂與范雎入咸陽已報使因言曰魏有張祿先生天下辯士也曰秦王之國危於累卵得臣則安不可以書傳也臣故載來後秦王拜雎為相

賢德

夫家陪攸設命曰諸侯之臣德用孔彰乃為巨室之慕
本自列國政出多門武力相征謀臣並驚達從政之道
處交兵之間而能滅私徇公克己致讓謙抑周慎教戒
垂裕改過不吝容衆在寬正以御家忠以事上信義兼
著貞白自守飭行以絜矩恕己以推義無遺時哲得是
民好謹厚而知節廉約而繕性至於進退語默咸適其
宜昭厥聲猷為人景仰斯乃得士君子之道矣

臾駢為晉上軍佐初賈季奔狄趙宣子使臾駢送其孥
孥妻子也宣子以賈季中軍之佐同官故夷之蒐賈季戮臾駢臾駢之人欲
盡殺賈氏以報焉臾駢曰不可吾聞前志有之曰敵惠
敵怨不在後嗣忠之道也敵猶對也若及子孫則為非對非對則為遷怒夫子
禮於賈季我以其寵報私怨無乃不可乎言已蒙宣子寵位介
人之寵非勇也介因殺季家欲以除仇宣子將復怨也損怨益仇非知也
已是以私害公非忠也釋此三者何以事夫子盡具其
帑與其器用財賄親帥扞之送致諸境

子良鄭公子也鄭靈公遇弑鄭人將立子良

穆公子辭曰
庶子辭曰

以賢則去疾不足

去疾子良名

以順則公子堅長乃立襄公

襄公襄公將去穆氏逐羣臣而舍子良

以其子良不可曰讓已

穆氏宜存則固願也若將亡之則亦皆亡去疾何為

何為

獨留乃舍之皆為大夫

郤克

郤獻子也

為晉大夫將中軍靡笄之役韓獻子將斬人

郤獻子馳將救之至則既斬之矣郤子使速以狗告其

僕曰吾以分謗也

不欲韓氏獨受謗

士燮

范文子也

為晉大夫佐上軍靡笄之役郤獻子師勝而

反范文子後入武子曰燮乎汝亦知吾望爾也乎對曰

夫師郤子之師也其事臧若先則恐國人之屬耳目於

我也故不敢武子曰吾知免矣

公子黑肱為鄭大夫有疾歸邑于公

黑肱
公子張

召室老宗人

立段

段子石
黑肱子

而使黜官薄祭

黜官無
多受職

祭以特羊殷以少

牢

四時祀以一羊三年
盛祭以羊豕殷盛也

足以供祀盡歸其餘邑曰吾聞

之生於亂世貴而能貧民無求焉可以後亡敬共事君

與二三子生在敬戒不在富也是月子張卒君子曰善

戒詩曰慎爾侯度用戒不虞鄭子張其有焉詩大雅侯維也義取

慎法度
戒未然

華元為宋大夫宋城華元為植巡功植將主也城者謳曰

其目皤其腹棄甲而復

皤出皤大腹謂亡師

于思于思棄甲復

來于思多于思之貌使其驂乘謂之曰牛則有皮犀兕尚多棄甲
則那那猶何也役人曰從其有皮丹漆若何華元曰去之夫

其口衆我寡

傳言華元不吝其谷寬而容衆

子罕為宋司城鄭尉氏司氏之亂其餘盜在宋

亂在魯襄公十

年鄭人以子西伯有子產之故納賂于宋

三子之父皆為尉氏所殺

故以馬四十乘

百六十四

與師蔑師惠

樂師也蔑惠其名也

公孫黑為

質焉

公孫黑子晳也

司城子罕以堵汝父尉翩司齊與之良司

臣而逸之

賢而故之

託諸季武子武子寘諸卞

子罕以司鄭臣託季氏

人醢之三人也

三人堵汝父尉翩司齊也

師慧過宋朝將私焉

私小便

其相曰朝也

相者師

慧曰無人焉相曰朝也何故無人慧

曰必無人焉若猶有人豈其以千乘之相易淫樂之曇

必無人焉故也

千乘之相謂子產等也言不為子產殺三盜得賂而歸之是重淫而輕國相

子罕聞之固請而歸之

言子罕能改過

荆人士尹

尹一作君池使於宋子罕止而觴之南家之牆擁

於前而不直西家之潦經於宮而不止士尹池問其故

子罕曰南家工人也為輓者也吾將徙之其父曰吾恃

為輓以食三世矣今徙是宋邦之求輓者不知吾處也

吾將不食願相國之憂吾不食也為是故不徙也西家

高吾宮卑潦之經吾宮也利為是故吾不禁也士尹池

歸荆適興兵欲攻宋士尹池諫於王曰宋不可攻也其主賢其相仁賢者得民仁者能用人攻之無功為天下笑楚乃釋宋而攻鄭孔子聞之曰夫修之于廟堂之上而折衝于千里之外者司城子罕之謂也

范武子為晉大夫宋向戌請弭諸侯之兵為會于宋楚子木問於趙孟曰范武子之德何如士會賢聞於諸侯故問之對曰夫子之家事治言於晉國無隱情其祝史陳信於鬼神無愧辭祝陳馨香德足副之故不愧子木歸以語王王曰尚矣尚也

能歆神人

歆享也使神享

宜其光輔五君以為盟主也

五君文襄

靈成景也

子產為鄭大夫豐卷將祭請田焉弗許

田獵也

曰惟君用

鮮

鮮野獸

衆給而已

衆臣祭以易豢為足

子張怒

子張豐卷也

退而徵役

召兵欲

攻子產

子產奔晉子皮止之而逐豐卷

豐卷奔晉

子產

請其田里

請於公不沒入

三年而復之反其田里及其入焉

田里

所收

入

叔孫豹為魯大夫李武子伐莒莒人告於虢之會楚告

於晉請戮其使

時叔孫豹在會欲戮之

樂王鮒相趙文子欲求貨

於叔孫而為之請叔孫弗與曰諸侯之會衛社稷也我

以貨免魯必受師是禍之也何衛之為雖怨季孫魯國

何罪叔出季處有自來矣吾又誰怨趙孟聞之曰臨患

不忘國忠也

謂言魯思難不越官信也

謂言叔圖國忘

死貞也謂不以謀主三者義也

三者忠信貞

有是四者又可

戮乎

并義乃請諸楚曰魯雖有罪其執事不辟難執事

謂叔孫畏威而敬命矣

謂不敢避戮

子若免之以勸左右可也若

子之羣吏處不避汙

汙勞事

出不逃難

不苟免

其何患之有

患之所生汙而不治難而不守所由來也能是二者又

何患焉不靖其能又誰從之

安靖則衆賢能附從

魯叔孫豹可謂

能矣請免之以靖能者子會而赦有罪

不伐魯

又賞其賢

孫赦叔諸侯其誰不欣焉望楚而歸之視遠如邇疆塲之

邑一彼一此何常之有恤大舍小足以爲盟主子其圖

之固請諸楚楚人許之乃免叔孫

陳桓子爲齊大夫欒施高彊來奔於魯陳鮑分其室晏

子謂桓子必致諸公讓德之主也讓之謂懿德凡有血氣皆有爭心故利不可彊不可彊取思義為愈義利之本也

蘊利生孽蘊畜也孽害也姑使無蘊乎可以滋長桓子盡致

諸公而請老子荀子齊邑桓子召子山子山子商子周襄三十一年子尾所

逐羣私具幄幕器用從者之衣屨私具不告公而反棘焉棘子

山故邑齊國西安縣東有戰里亭子商亦如之而反其邑子周亦如之

而與之夫于子周本無邑故更與之齊反子城子公公

孫捷三子襄八年子旗所逐而皆益其祿凡公子公孫之無祿者

私分之邑

桓子以邑分之

國之貧約孤寡者私與之粟公與

桓子晉之旁邑辭

讓不
受

穆孟姬為之請高唐陳氏始大

穆孟姬景公母傳

言陳氏所以興

叔孫婼魯大夫也為晉人所執叔孫所館者雖一日必

葺其牆屋

葺補治也

去之如始至

不以當去而有所毀壞

延陵季子吳公子也楚子期伐陳季子救之謂子期曰

二君不務德

二君吳楚

而力爭諸侯民何罪焉我請退以為

子名務德而安民乃還

季子吳王
壽夢少子

司馬牛為宋大夫桓魋之弟也桓魋之寵害于公恃寵

驕盈

公使夫人驥請享焉而將討之夫人景公母也數請享飲欲因請討未及

魋先謀公請以鞍易薄鞍向魋邑薄公邑欲因

易邑為公享宴而作亂乃益鞍

七邑而請享公焉僞喜受賜于以日中為期家備盡往

甲兵之備

公知之魋奔衛司馬牛致其邑與珪焉而適齊珪守邑符信

向魋出於衛地公文氏攻之公文氏衛大夫求夏后氏之璜焉

與之他玉而奔齊陳成子使為次卿司馬牛又致其邑

焉而適吳示不與魋同吳人惡之而反趙簡子召之陳成子

亦召之卒於魯郭門之外阤氏葬之丘

阤氏魯人也
泰山南城縣

北有輿城錄其卒葬

所在愍賢者失所

沈諸梁字子高為楚葉公白公勝作亂殺令尹子西司

馬子期圍公陽穴宮負王

昭王子以如昭夫人之宮

楚大夫昭夫人葉公亦至及北門或遇之曰君胡不胄國人王母越女

人望君如望慈父母焉盜賊之矢若傷君是絕民望也

若之何不胄乃胄而進又遇一人曰君胡胄國人望君

如望歲焉

歲年穀也

日月以幾

冀君

來若見君面是得父也

艾安

也民知不死其亦夫有奮心猶將旌君以徇於國

旌表也

而又掩面以絕民望不亦甚乎乃免胄而進言葉公遇

得民心

箴尹固帥其屬將與白公欲與白子高曰微二子者楚

不國矣

二子子西子期也相舉之敗二子功多

葉德從賊其可保乎乃從

葉公使與國人以攻白公白公縊死沈諸梁兼二事

二事

令尹國寧乃使寧為令尹子西之子國使寬為司馬

子期之子

而

老於葉

趙文子為晉大夫其中退然如不勝衣

中身也退柔和貌鄉射記曰弓

二寸以為侯中退或為安其言呐呐然如不出諸其口

呐貌

舒所舉於

晉國管庫之士七十有餘家

管庫之士府史以下官長所置也舉之於君以為大

夫士也生不交利

廉也死不屬其子焉潔

晏嬰為齊大夫事齊靈公莊公景公其在朝君及之卽危言語不及之卽危行國有道卽順命無道卽衡命以此三世顯名於諸侯

冊府元龜卷七百三十七